

國

朝

文

錄

孫文定公文錄引

朱文端公集有雜文無奏疏孫文定公集有奏疏無雜文予讀之皆不能滿意然文端之雜文醇說體皆可爲典據文定之奏疏暢論事尤大有風裁三習一弊疏爲從古名臣講格心之學者之所未到當爲我朝第一篇大文其他請開酒禁爲經生家之所不知請定大學規模爲八股先生之所莫辨以及論耗羨歸公之須防流弊論旗圈民房之不可增租論贖入旗公產之不可畫爲一法皆燭之如鏡理之如梳曾子固謂明足以周萬事之理道足以適天下之用智足以知難言之意文足以發難顯之情者文定公

實不愧焉。末附南遊記一篇，析之生面各別，可爲數篇雜文。合之氣脉貫通，如常山之蛇，之首尾皆應。錄之俾不出戶庭者，可展卷而如行天下之半。亦云快已。吾聞文定公清修亮節，爲一時偉人，而經術湛深于易詩尤邃。乾隆初，修詩義，折中博稽，獨斷實出其手。與文端公之禮皆傳誦藝林，後有論本朝人物，歟而可祭于韓宗者，知不能遺此二公也。上高李祖陶撰。

孫文定公文集目錄

卷一

三習一弊疏

請開酒禁疏

辦理耗羨疏

旗圈民房疏

八旗公產疏

大學條規疏

撫綏苗猺疏

卷二

南遊記

孫文定公文錄卷一

興縣孫嘉淦齋著

後學上高李祖陶欽

上高冷重熙化

○○○三習一弊疏

奏爲勉竭愚衷仰祈 睿鑒事。臣一介庸愚，學識淺陋，荷蒙

皇上隆恩，畀以風紀重任，日夜悚惶，思竭愚夫之千慮，仰贊高深

於萬一，而數月以來，捧讀

上諭，仁心仁政，愷切周詳，凡臣民之

所欲而口不能言者，

皇上皆已行之矣。事無可言，所欲言者，

皇上之心而已。我

皇上之心，仁孝誠敬，加以明恕，豈復尚有可

議哉。而臣猶有欲言者。正於心無不純。政無不善之中。而有所慮焉。故過計而預防之也。今夫治亂之循環。如陰陽之運行。坤陰極盛。而陽生。乾陽極盛。而陰始。事當極盛之際。必有陰伏之機。其機藏於至微。人不能覺。而及其既著。遂積重而不返。此其中有三習焉。不可不慎戒也。主德清。則臣心服。而頌仁政多。則民身受。而感出一言。而盈庭稱聖。發一令。而四海謳歌。在臣民原非獻諛。然而人君之耳。則熟於此矣。耳與譽化。匪譽則逆。故始而匡拂者拒。繼而木訥者厭。久而頌揚之。不工者亦絀矣。是謂耳習於所聞。則喜諛而惡直。上愈智。則下愈愚。上愈能。則下愈畏。趨蹌諂脅。顧盼而

皆然。免冠叩首應聲而卽是者。臣工以爲盡禮。而人君之目則熟於此矣。目與嬖化。匪嬖則觸。故始而佞野者斥。繼而嚴憚者疎。久而便辟之不巧者亦忤矣。是謂目習於所見。則喜柔而惡剛。敬求天下之士。見之多。而以爲無奇也。則高己而卑人。慎辨天下之務。閱之久而以爲無難也。則雄才而易事。質之人而不聞其所短返之己。而不見其所過。於是乎意之所欲。信以爲不踰。令之所發。概期於必行矣。是謂心習於所是。則喜從而惡違。三習既成。乃生一弊。何謂一弊。喜小人而厭君子是也。今夫進君子而退小人。豈獨三代以上知之哉。雖叔季之主。臨政願治。孰不思用君子。且自智。

之殺各賢其臣。孰不以爲吾所用者必君子而決非小人。乃卒於小人進而君子退。若無他用才而不用德故也。德者君子之所獨。才則小人與君子共之。而且勝。謬語言奏對。君子訥而小人佞諛。則與耳習投矣。奔走周旋。君子拙而小人便辟。則與目習投矣。卽課事考能。君子孤行其意而恥於言功。小人巧於迎合而工於顯勤。則與心習又投矣。小人挾其所長以善投人。君溺於所習而不覺。審聽之而其言入耳。諦觀之而其貌悅目。愿試之而其才稱乎心也。於是乎小人不約而自合。君子不逐而自離。夫至於小人合而君子離。其患豈可勝言哉。而揆厥所由。皆三習爲之蔽焉。治亂

之機千古一轍。可考而知也。我皇上聖明首出。無微不照。登庸
耆碩。賢才彙升。豈惟並無此弊。亦並未有此習。然臣正及其未習
也。而言之。設其習既成。則有知之而不能言。言之而不見聽者矣。
今欲預除三習。永杜一弊。不在乎外。惟在乎心。故臣欲言。皇上
之心也。語曰。人非聖人。孰能無過。此淺言也。夫聖人豈無過哉。惟
聖人而後能知過。惟聖人而後能改過。孔子曰。五十以學易。可以
無大過矣。大過且有。小過可知也。聖人在下。過在一身。聖人在上。
過在一世。書曰。百姓有過。在予一人是也。故曰。文王視民如傷。望
道而未之見。文王之民無凍餒。而猶以爲傷。惟文王知其傷也。文

王之易貫天人而猶未見道。惟文王知其未見道也。賢人之過。賢人知之。庸人不知。聖人之過。聖人知之。賢人不知。欲望人之繩愆糾繆。而及於所不知。難已。故望皇上之聖心。自慄之也。危微之辨。精而後知。執中難允。懷保之願宏而後知。民隱難周。謹幾存誠。返之己而貞。知其不足。老安少懷。驗之世而實。見其未能。夫而後欲然不敢。以自是。不敢自是之意。流貫於用。人行政之閒。夫而後知諫諍切蹇。愛我良深。而諛悅爲容者。愚已而陷之阱也。夫而後知嚴憚匡拂。益我良多。而順從不違者。推已而墜之淵也。耳目之習除。而便辟善柔便佞之態一見而若浼。取舍之極定。而嗜好宴

安功利之說無緣以相投夫而後治臻於郅隆化成於久道也不然而自是之根不拔則雖斂心爲慎慎之久而覺其無過則謂可以少寬勵志爲勤勤之久而覺其有功則謂可以稍慰夫賢良輔弼海宇昇平人君之心稍慰而欲少自寬似亦無害於天下而不知此念一轉則嗜好宴安功利之說漸入耳而不煩而便辟善柔便佞者亦熟視而不見其可憎久之而習焉忽不知而爲其所中則黑白可以轉色而東西可以易位所謂機伏於至微而勢成於不可返者此之謂也是豈可不慎戒而預防之哉書曰滿招損謙受益又曰德日新萬邦惟懷志自滿九族乃離大學言見賢而不

能舉至於好惡拂人之性而推所由失皆因於驕泰滿與驕泰自
是之謂也由此觀之治亂之機轉於君子小人之進退進退之機
握於人君之一心能知非則心不期敬而自敬不見過則心不期
肆而自肆敬者君子之招而治之本肆者小人之媒而亂之階也
然則治流溯源約言蔽義惟望我皇上時時事事常存不敢自
是之心而天德王道舉不外於此矣語曰狂夫之言哲人擇焉臣
幸生聖世昌言不諱故敢竭狂瞽之論惟皇上包容而垂察
焉則天下幸甚謹奏

此文定公乾隆元年所上疏也孟子人不足與適也政不足問

也惟大人爲能格君心之非格心之說程朱最醇而詞氣尙樸
從未有深切著明發露淨盡如此疏者當與伊訓說命同垂萬
世

。請開酒禁疏

奏爲敬陳管見仰祈 睿鑒事。本月初九日內閣奉 上諭養民之政多端。而莫先於儲備。所以使粟米有餘。以應緩急之用也。夫欲使粟米有餘。必先去其耗穀之事。而耗穀之尤甚。則莫如燒酒。燒酒之盛行。則莫如河北五省。夫小民自營其生。稍有錙銖。輒以縱飲爲快。無裨於喪祭賓客老病之用。而適以啟喧嘩角鬥之媒。特以飲少輒醉。其價易售。人皆樂其便利。故造之者多。而耗米穀也較他酒爲甚。往者 皇祖 皇考屢嚴燒鍋之禁。有司陽奉陰違。必務器口噉噉。始不得已而稍查禁約。及薄有收穫。仍然公行。

無忌夫與其禁於已饑之後。節省於臨時。孰若禁於未饑之先。積貯於平日。今卽一州一邑而計之。歲耗穀米少者萬餘石。多者數萬石不等。則禁酒之後。通計五省所存之穀。已千餘萬石矣。雖有穀數石之家。不能皆分所有。以周貧乏。而所存之穀。自在民間。可以通融接濟。較之無米之炊。不啻霄壤矣。况遇歲稔豐收。穀必甚賤。貧民之生計益饒。家有蓄藏之效。未必不由於此。而無識之人。或以造酒之家。不免失業爲慮。不知壟斷市利率。由黠悍之富民。用其資財。半通官吏。敢於觸禁肆行。並非貧民無力者之生業也。是禁之則貧民裕生養之資不禁。則富民獲漁利之益。其閒得失。

利害較然可觀。朕籌之已熟。北五省燒鍋一事。當永行嚴禁。無可疑者。至於違禁私造之人。及賄縱之官吏。如何從重治罪。其失察之地方官。如何嚴加處分之處。著九卿卽行定議具奏。欽此。仰見我皇上勤求民隱。撙節愛養之至意。臣等自當實力奉行。詳思所以禁約之方。但臣生長田間。食貧居賤。二十年來農商之疾苦。閭閻之情僞。閱歷既久。知之頗詳。見此事所關甚大。惟恐措置不善。徒滋煩擾。而無益於民。尙祈皇上再審之也。伏讀上諭。河北五省燒酒盛行。特以飲少輒醉。其價易售。人皆樂其便易。故造之者多。則是造酒之由。皇上既知之矣。又讀上諭。燒酒之禁。

有司陽奉陰違。黜悍富民。用其資財。半通官役。敢於觸禁。肆行。則是禁酒之弊。皇上亦知之矣。知其造之多。而禁之難。而猶斷然必禁者。蓋以造酒之家。類皆富民。而非貧民之生業。禁酒而存米。則富民不過暫擾於一旦。而貧民將享樂利於無窮。此其所以斷然禁之而不疑也。臣之愚昧。則以爲燒酒之禁。無論禁之而滋擾。擾之而終不能禁。借令禁之不擾。而遂能永禁。其於貧民之生計。米穀之蓋藏。不惟無益。而且有損。臣請詳言之。望皇上鑒宥而採擇焉。夫所謂作酒醪以糜穀者。爲黃酒言之也。黃酒之麴。必用小麥。其米則需糯粳秫黍。此皆五穀之最精且良。糜之誠爲可

惜○若○白○酒○則○用○高○糧○而○佐○以○豆○皮○黍○穀○穀○糠○之○類○其○麴○則○用○大○麥○
大○麥○與○高○糧○非○朝○夕○所○常○食○而○糠○穀○等○項○本○屬○棄○物○雜○而○成○酒○可○
以○得○重○價○其○糟○可○以○喂○六○畜○此○乃○化○無○用○爲○有○用○非○作○無○益○以○害○
有○益○也○他○若○棗○柿○葡○萄○等○類○皆○可○燒○酒○乃○天○地○自○然○之○利○不○需○米○
穀○而○成○今○欲○禁○燒○酒○而○併○禁○黃○酒○則○無○以○爲○祭○祀○賓○客○養○老○之○用○
誠○有○所○不○可○若○不○禁○黃○酒○而○止○禁○燒○酒○則○是○使○天○下○巨○萬○億○兆○飲○
燒○酒○之○人○皆○轉○而○飲○黃○酒○飲○燒○酒○四○兩○而○醉○者○飲○黃○酒○二○三○斤○而○
不○足○則○黃○酒○之○沽○必○什○倍○於○前○而○小○麥○糯○黍○之○需○不○可○以○數○計○矣○
省○大○麥○高○糧○之○粗○且○賤○者○而○倍○費○小○麥○糯○黍○之○精○且○良○者○此○臣○所○

謂○無○益○於○蓋○藏○者○也○至○小○民○之○生○計○則○豈○特○口○食○已○哉○必○將○以○釜○
餽○爨○而○以○鐵○耕○百○工○之○所○爲○皆○需○以○粟○易○之○而○又○有○稅○糧○之○徵○衣○
服○鹽○蔬○之○用○婚○嫗○疾○病○喪○葬○之○費○非○糶○五○穀○不○得○也○故○粟○大○貴○則○
病○末○大○賤○則○傷○農○得○其○中○而○後○農○末○俱○利○故○農○有○歉○荒○亦○有○熟○荒○
計○十○年○之○內○歉○歲○三○而○豐○歲○七○則○粟○宜○有○所○洩○非○但○積○之○不○用○而○
已○今○北○五○省○之○地○不○種○高○糧○則○無○以○爲○薪○席○屋○牆○之○用○種○之○而○用○
其○稽○稗○則○其○顆○粒○宜○有○所○售○賣○燒○鍋○既○禁○則○富○民○不○買○高○糧○而○貧○
民○之○高○糧○雖○賤○而○不○售○高○糧○不○售○而○又○必○需○酒○則○必○賣○米○穀○以○買○
黃○酒○向○者○一○歲○之○內○八○口○之○家○賣○高○糧○之○價○可○得○七○八○兩○今○止○二○

三兩矣。買白酒之費不過二三兩。今買黃酒則費七八兩矣。既以
所入少而所出多。又加以糶糠稷之類堆積而不能易錢。園林
果木之實腐朽而歸於無用。牛羊猪鷄等畜艱食而不能肥腩。自
然之利皆失。則日用所需惟糶米麥糶而售。則家無蓋藏。糶之而
不售。則完納稅糧以及衣服婚喪之用皆絀。此臣所謂有損於生
計者也。且夫小民之趨利如水就下。此非政刑所能防也。利所不
在。雖賞之而不爲利之所在。則禁之而愈甚。燒鍋禁則白酒少。酒
少則價必貴。價貴則私燒之利什倍。什倍之利之所在。則民以性
命爭焉。私鑄銅錢私造賭具罪至斬絞。軍流而民猶或犯。無他。爭

利故也。今私燒白酒則將定以何罪乎。我皇上大聖至仁斷不
忍以飲食細故而置民於大辟。則其罪必不比於私鑄造賭罪。輕
於彼而利有甚焉。欲民之不犯難矣。不得已也。而重官吏之處分
官畏處分則查拿中商小賈類皆失業而豪富之家高牆深院查
拿之所不至。敢於觸禁則富民益獲漁利之益。貧民不勝其欲而
思效之。將改造其器而變易其法。於是乎釀醋之盆皆可釀醋。蒸
飯之甑皆可以蒸酒。有司奉行不謹則賄縱而分其貲財。奉行過
謹則橫拿而傾其身家。不止如是而已。夫醋盆飯甑則何家不有
哉。一家之盆甑偶爾犯法則萬家之盆甑盡屬可疑。將炊爨之民

比戶可以查拿。日用之物。隨手可以訛詐。公庭無非。計酒之訟。而
囹圄亦不能容犯酒之人矣。孟子曰。君子不以所養人者害人。本
爲小民之生計。而滋擾如此。則立法不可不慎也。昔之愚昧。以爲
燒鍋之禁。或宜於歉歲。而不必宜於豐年。歉歲粒米維艱。則大麥
高糧之類。亦可以療饑。禁之誠爲有益。但止可禁於成災之地。而
各處不必通行。亦但可善爲勸懲。暫行封貯。而不必壞其器具。而
加以刑罰。至豐年米穀足食。則大麥高糧之類。原非朝夕常食之
物。自宜開通酒禁。使官吏無由需索。而民間亦得出其不急需之
顆粒。無所用之。批糠轉移售賣。以佐不時之費。則上下不擾。而百

姓自享盈寧之慶矣。望皇上爲斯民熟計之也。臣本生聖人之
世受不次之恩。惟願吾堯舜之君。一無過舉。惟恐吾堯舜之民
少有怨咨。是以敢竭其芻蕘之見。伏祈

皇上睿鑒施行。臣謹奏

十七日奉

上諭。硃批。總理事務王大臣會同九卿詳議具奏。朕之所以命禁
燒鍋者。原爲民食起見。今觀孫嘉淦所奏。是嚴禁亦有不必不可行
者。王大臣不可曲從朕旨。亦不必迴護嘉淦。其和衷定議以聞。若
嚴禁燒鍋。不但於民食無益。而且有害。則朕旨可收回。何難改正。

耶欽此

此謬發於方侍郎苞固自謂考之古而無疑矣及此疏出則適見其迂腐徒多讀書而不識時務矣然出他人手亦不能如此曲盡

。辦理耗羨疏

奏爲欽奉 上諭事、准吏部咨、乾隆七年四月初六日奉 上諭、
辦理耗羨一事、乃當今之切務、朕夙夜思維、無善策、是以昨日臨
軒試士、以此發問、意諸生濟濟、或有剴切敷陳、可備採擇、見諸施
行者、乃諸貢士所對、率皆敷衍成文、全無當於實事、想伊等草茅
新進、未登仕籍、於事務不能曉徹、此亦無怪其然、今將此條策問、
發與九卿翰林科道閱看、伊等服官有年、非來自田間、可比、可悉
心籌畫、各抒所見、具摺陳奏、候朕裁度、若無所見、亦不必勉強塞
責、至外省督撫、寄重封疆、諒必籌畫有素、並着各據所見、具摺奏

聞務期無隱無諱以副朕集思廣益之意欽此抄粘策問一條前來欽遵敬閱仰見我皇上輕賦愛民無微不至求言廣益無遠不屆臣職任封疆籌畫乃知耗羨一事固有所不可已提解歸公其法實不可輕變也伏查古者取民之法實不過布縷粟米之征而輦送官物皆用民力卽在力役之征之內故有正供而無耗羨不需耗羨也嗣後變貨幣爲銀兩則傾銷有費矣變夫役爲傭傭則解送有費矣故隨正供而輸耗羨不得不需耗羨也然皆陰有其實而不欲居其名故未嘗明定其加耗之數與夫支用之章程以至不肖有司得任意私征而爲上司者轉因以爲利苞苴公行

而廉隅不飭徵收無定而股削日深一有地方公事其已飽震者不肯捐出則又派之民間因公科取之舉借端百出而不可究詰蓋自定賦輸銀以來其弊相沿而未有止也

世宗憲皇帝

明燭無疆謀成獨斷以爲與其暗收而多征不若明定其數與其私營而中飽不若責其辦公故就各省情形酌定一分數釐之額提其所入於藩庫以大半給各官爲養廉而留其餘以辦地方之公務嗣是以來征收有定官吏不敢多取計其已定之數較之未定以前之數尙不及其少半則是迹近加賦而實減之且養廉已足上司不得需索屬員辦公有資州縣不敢苛索百姓餽送謝絕

而難派無由故曰雍正年間無清官非無清官也夫人而能爲清
官也是則耗羨歸公既無害於民生復有補於吏治而議者猶皆
以爲加賦可謂耳食者矣夫事當核其實不可登其名今避加賦
之名則當舉耗羨而槩除之試問傾銷解送之費州縣能盡賠墊
乎不能則將復暗取於民而多寡無定乎試問各官之養廉地方
之公事正項能盡支給乎不能則將復使因公科取而擾累無已
乎况耗羨未定之時凡得一官親戚僕從待養者數百人尙能餽
上司而送京官今則無餘潤以及人矣耗羨未定之時凡遇公事
強輸派捐公事既竣尙能有以餉私橐今則資正項以接濟矣是

昔之取民也多今之取民也少亦既信而有徵矣所取少自無不
便於民之處所取少則所留多自可漸有富厚之望此事昭然本
無可疑凡設爲疑似之言者皆游客情民之欲借滙於官與夫不
肖官吏之欲變歸公之法者顯以名動皇上實欲自便其私可
概置之不議不足以煩聖聽也抑臣更有請者天下無不弊之法
當及其弊之未成而救之昔世宗憲皇帝立法之始廷臣
沈近思等以爲耗羨歸公必成正項將來耗羨之外又增耗羨
憲皇帝面諭以此項銀兩止令督撫將收支之數年終奏明不必
報部查核自不致成正項羣臣翕然從之其議遂定雍正四年河

南巡撫田文鏡咨部以耗羨銀兩製造盛甲工部駁令題銷欽奉
上諭耗羨銀兩與營伍中數分公糧存貯公所原爲本省本營之
中有公事需用使地方營伍備用有資不致派累兵民乃通權達
變之法並非正項錢糧可比也今因製造盛甲咨部部中並不請
旨駁令具題甚屬錯謬工部堂官着交部察議此時若將耗羨銀
兩俱比照正項具題報銷相沿日久或有不肖官員指耗羨爲正
項而於耗羨之外又事苛求必致貽累小民此風斷不可畏欽此
欽遵在案洋洋 聖謨指示明切其爲百姓計至深遠也嗣因各
省督撫辦理有不能謹慎者於雍正十三年六月間欽奉 諭旨

令按年造冊隨同正項錢糧送部核銷自是以來定例日加密矣
每有動支無論多寡必先報部不准則不敢擅動矣隨同正項造
冊報銷不合例則駁令追賠矣夫督撫之辦地方公事原有後不
可以爲例而一時不能不然報部不准開銷而情勢必不容已者
賴有此項銀兩通融接濟則官不賠而其累不及於民今隨同地
丁錢糧報銷則與正供不復能有差別而凡地方公事之不容已
而又不准開銷者必須賠墊上司賠墊則取償於屬員而餽送之
路開屬員賠墊則取償於百姓而重賦征收因公科斂之端起然
則耗成正項耗外加耗之弊雖峻防之其流有所不能止也今欲

少寬假焉。議者必謂無以杜督撫之侵用。不知此在任人。不在任法。督撫苟賢。雖不報部。其肯自穢乎。若其不肖。則報部之冊。卽其作樂之藪。未見其果能杜也。且耗羨歸公。有年矣。報部核銷於今。亦有年矣。則某省之耗羨。僅足敷用。某省有餘。某省不足。戶部亦知之詳矣。其僅敷與不足者。雖欲侵用而末由。所可作樂者。在其餘之省分耳。今若將有餘之省。核畱敷用之數。其所餘者。減輕耗此上員額。以予百姓。使百姓受輕賦之益。而督撫又無侵用之由。其法乃益盡善。併可不煩戶部之查核。而所謂耗成正項之流弊。亦可以永杜也。故臣之愚意。以爲耗羨有所不可已。歸公之法。有所不可

變但當思其流弊而預爲之防伏願核耗羨之昔多今少知其無
不便於民官吏之昔貪今廉知其必有益於國慎守已成之法勿
爲浮議所動查耗羨之有餘者輕減之使百姓沐
無由侵蝕復年終奏聞之舊例無使瀆報於前苛駁於後以杜耗
成正項耗外加耗之弊則百姓長受耗羨歸公之利而不滋其害
不惟敷政安民之切務亦繼志述事之大端也伏讀 聖諭有曰
各據所見無隱無諱 臣是以不敢隱飾多有罔識忌諱之語伏望
皇上宥其迂觸而加採擇焉 臣不勝惶悚之至 謹奏

八月初七日奉

硃批耗羨一摺畱中

有一例卽生一弊耗羨歸公當時原以杜苛派豈意不久卽成正歛而耗外加耗尙苦不足耶

○旗園民房疏

奏爲旗園民房事查直隸地方多被旗園當日圈地之時例從園外下繩是以鎮店村庄多在園外然而所圈旣廣則零星村庄列在園內者亦復不少其帶地投充之人房屋人口盡行入旗其未經投充之人則地雖被圈人房尙在小民戀土重遷雖有撥補地畝不肯舍房就地是以父子祖孫相沿居住民人自住其房而租種旗地旗人止收地租而並不問及民房通省州縣旗民相安毫無異說數十年於茲矣突於雍正九年間有樂亭縣庄頭蘇爾岱等以民房旣在園內卽係旗房按戶索租派命喂馬以致民人張

文傑等紛紛呈控於雍正十年經內務府委員會審以房係民人祖業但既在旗園之內房基又已除糧今每門面房一閒出小數錢五百文嗣因蘇爾岱等以止給門面房租餘房尙未征錢又在內務府控告於雍正十二年又行委員會審以民房既係祖遺即便令出房租應丈量房基斷給地租結案而蘇爾岱等又在內務府控告稱房在園內卽係旗房欲按間起租併追歷年所欠租銀私造房冊十五本以圖抵賴嗣經地方官審出真情將假冊除銷仍照前斷給與房基地租乃蘇爾岱等又稱民人私行毀拆房屋盜賣木植等情駕控而內務府亦咨稱房屋在園內卽係官房應

斷還庄頭按間起租不許民人拆毀變賣經前督臣李衛委員研
審民人所拆賣者皆係自己祖手所遺房屋並與旗人無涉仍照
前斷給與房基地租再加小數錢一百文冀以完結此案又經內
務府以庄頭人等現住之房亦係當日所圈民房如旗地民房之
詔不爲改正則旗人所住之房將恐盡爲民佔此語甚明咨駁前來經前督
臣李衛再三分晰以圈地並不圈房是以地畝有檔冊而房無檔
冊地畝有撥補而房間無撥補如將圈內民房盡歸於旗則數十
州縣之人俱無一椽之託流離失業何所底止懇請仍照前議咨
呈去後於乾隆三年准內務府咨稱此案旗民構訟數年未結今

直督雖議以房基照膏腴地畝起租。而蘇爾岱等呈稱膏腴上地。每畝租銀一兩五錢等語。應令地方官將房基逐一查明。每畝折衷定爲一兩。仍外加小錢一百文。將從前拖欠租銀。嚴行照數追給。蘇爾岱等當差等。因到臣當經轉行去後。茲據樂亭縣知縣施世洪詳稱。會同委員前往鄉村查丈各村民人。堅稱房地是其祖遺。圈地並不圈房。到處環繞。呼天搶地。雖經責懲而不止。小民盈千累百。未便概以刑杖壓制。等因前來。臣將歷年案卷詳細檢閱。圈內房地是旗是民之處。並無諭旨。以及部文檔案租約契卷等項。其蘇爾岱等計訟。止以旣在旗圈之內。卽係旗房爲詞。而審

問之官亦止以房基既已除糧自應出租爲斷不知村庄房閒皆
隨地畝故地有糧而房無糧今所圈之地既已撥補所補之地仍
復有糧則所遺房閒不應重複加征是房本無糧非昔有而今除
也○朝廷既未明加其稅庄頭何可私徵其租○至房在圈內卽係
旗房亦屬懸揣臣伏思圈佔之意固欲使旗人有可耕之田得以
務本亦非使民人無立錫之地盡皆流離若果圈內之房盡應歸
旗則當日初圈之時何難驅逐其民人而補撥其房閒乃仍令民
居住不行撥補亦不取其房租此實○世祖章皇帝如天好生
之仁欲使滿漢人等並生並育於耨穀以成林總無外之盛治○

聖祖 世宗顯承未改滿漢聚處祖孫相沿自當悉遵舊制不
可絲毫更張其蘇爾岱等偶爾告爭止宜曉以太義 國法令其
寢息乃從前地方官瞻徇遷就先斷房租以致爭租追欠訐訟不
休即使此案勉強完結而畿輔千里旗圈之內所有民房萬萬千
千不可紀極若援照此案羣起告爭則訟獄繁興北人婦子俱無
寧宇 國體民情所關甚鉅臣之愚意仰懇 聖恩將此案房
閒免其斷給租銀令旗民仍舊各管各業以結塵案嗣後圈內房
閒總以現在管業者爲定如民人於祖遺房外又佔旗地多蓋房
屋或旗人將民人祖遺房屋妄行告訐希圖取租者俱照違制律

治罪則滿漢相安無由訐訟。畿輔兆民永戴一皇仁於無既矣。謹奏。

李說圈地並不圈房先生并云地有糧而房本無糧追進一層奸棍更何從置喙

○○入旗公產疏

奏爲遵 旨詳議事。乾隆四年十一月初二日戶部奉 上諭爾等會同入旗議奏公產地價除抵補蓋造官房外其餘剩銀兩請給發地方官將從前典賣與民人之旗地贖回報部先儘原主取贖如原主不贖卽准各旗官兵人等認買等語。朕思我朝定鼎之初將近京地畝圈給旗人在當日爲入旗生計有不得不然之勢。其時旗人所得地畝原足以資養贍而無缺乏。嗣因入旗生齒日繁恒產漸少。旗人又或因事急需。必不得已將地畝漸次典與民人爲業。雖民人不許私行典買旗地向有成例。但歷年久遠展轉

相售已成民產。今欲將從前典出旗地陸續贖回。必須於民人全無擾累。辦理始爲妥協。再以此項地畝。爾等議令原主取贖。及官兵認買。殊不知官員內。開有一二人。尙可扣俸認買。而貧乏兵丁。食餉有限。無從措價。勢必至盡歸富戶。富戶或肯周濟親族。亦豈能多爲分給。其所周濟能有幾何。則贖地一事。恐未必於貧乏旗人有益。可將此旨行文直隸總督孫嘉淦。詳悉妥議。務令於旗人有益於民人不擾。方爲兩便之道。餘著如所議行。欽此。欽遵行文。到臣仰見我皇上恩同天地。明並日月。務令漢滿軍民各得其所之至意。臣謹廣爲咨詢。詳加酌議。查民典旗地其來已久。誠如

聖諭展轉相售已成民產。且有蓋房屋葬墳墓於其中者。不爲
取贖。則旗人之生計不能充裕。盡爲贖之。則民人之生計不無擾
累。似在兩難之際。而臣以爲無難也。夫事必原其始。而核其實。知
其所以典地之故。則知所以贖地之方。伏查定例。民人不許私典
旗地。而往往私典者。豈果欲據爲世業哉。生長田閒。非種田無以
爲生。地既被圈。不得不租種旗地。又苦於田主之爭租。奪地不能
安其生也。於是乎乘其亟須。而思典之。其意止爲久種計耳。今動
公項以贖之。百姓不苦於得價還地。實懼其奪地另佃。而旗人雖
贖地。必不能自種。勢必仍令人租與其易人。而另佃誠不如仍其

舊之爲愈也。臣之愚意。但令地方官於贖地之時。查明現種之人。與現出之租。將其佃人姓名。租銀數目。造冊兩本。一存官署。一咨入旗。其後無論何人承買。其佃戶仍舊承種。其租銀照冊收取。不得分外需索。如本佃抗欠租銀。許地主呈官另佃。若本人並不欠租。而庄頭地棍。無故爭租奪種者。審實嚴加治罪。如田主果欲自種。則佃人雖不欠租。亦當退地。若田主並非自種。奪地另佃者。審實亦量加治罪。再租地人等。有於田內蓋房屋。葬墳墓者。如係本人種地。則令其照舊管業。如因欠租奪地。或田主自種退地。其房屋院落地基。並墳墓佔用地面。量明丈尺。畝數。照上等地畝出租。

不許田主人等勒令拆屋遷墳。如此則種地之人並無遷徙失業之苦。且慮其欠租另佃。自必上緊輸納。不惟民人全無擾累。抑且於旗人實有裨益矣。至贖地之法。原議欲以一分五釐利息核算。如每畝租銀一錢五分者。作價銀一兩等語。其意蓋恐不肖之人一聞贖地。或於文契之內有浮開價值。誑銀分用之弊。是以量爲畫一之法。以杜弊端。但旗民典賣田地情形。實有不同。有按季壓租。或三年五年者。有老租老典數十年或百年者。租則年滿退地。不給原銀。典則年限雖滿。亦必銀到取贖。其贖價多寡。視典租之年限。年近者一照原價。其年遠者則酌量讓減。此其大畧也。至典

此段言贖地之法

租文契多係經官用印。卽不用印。亦必有中保花押。若欲串通浮開。亦甚煩難。借使有之。不過百分之一二。今因一二奸民之弊。而概定一切之價以贖之。其在年限將滿者。官贖之價反多於私贖。而年限近者。則以爲短價而奪地於國帑。未能節省而轉滋物議。似尙有未協也。臣之愚意。此項地畝。旣交地方官取贖。自當逐案辦理。如果文契形迹可疑者。審有浮開情弊。則當治其詐僞之罪。將地竟行入官。不必復給價值。如並無情弊。則當照其年限。按年遞減。如地十畝。用價十兩。租十年者。則是每年租銀一兩。若已種九年。則以一兩贖之。種八年以二兩。七年以三兩。一切歷租。

地畝俱用此例核算。如係老典者，不論契載年限，當以十年爲率。其在十年以內者，俱照原典之價。十年以外，每十年減原價十分之一。五十年以外者，均以半價取贖。如此則所用贖地之銀較之概以一分五釐者，核算之數必有節省，斷無浮多。而逐案查核，情理俱得其平。旗人人民人皆戴皇仁於無旣矣。又部議稱業主令在本旗呈明，原地典主令在地方官首明，造冊送部，倘隱匿不首，將地入官，原主照隱匿官田例治罪。如年遠，原主不知坐落，典主有意隱匿者，亦照此例辦理等語。查現在辦理旗民互控地畝案件，多有旗人將納糧民地覲其膏腴，冒名告贖者。若令在旗呈明，

卽爲實據難保其無混行開報之弊至民典旗地之後有轉典與民人者亦有轉典與旗人者有頃畝零畸分開拆典者有展轉租典更換不易者歷年久遠人亡契失而概坐以隱匿之律撤其地而罪其人未免屈抑加以地棍訟師借端告訐滑吏靈役夤緣作笑何所不至民典旗地不下數百萬畝典地人民不下數十萬戶公產餘銀逐年劇積未必一二年閒盡行贖取而預開訐訟之門則是無事而滋擾也伏查老圈旗地界址甚爲分明至今猶在凡老圈之內但有民產卽係私典無法可以隱匿現今公產餘銀先將圈內之田取贖至於圈外旗地或係民人帶地投充或係旗人

各自買置。原與老圈舊畝不同。其典地之民人。有爲業已久。不願官贖者。亦有家計艱難。亟思轉售者。如圈內之地。皆已贖回。公產之銀。尙有餘剩。但將所剩之銀。交與地方官。查明願贖之家。陸續贖取。若未屆期。不必預查。如此十年八年。節次辦理。則旗產日漸充裕。而民人亦相安於無事矣。至贖地之後。旗人承買。更須酌議伏讀。上諭曰。貧乏兵丁。食餉有限。無從措價。勢必盡歸富戶。富戶或肯周濟親族。亦豈能多爲分給。則贖地一事。恐亦未必於貧乏旗人有益。聖謨洋洋。誠爲旗人思久遠之策也。查貧乏兵丁。不止無從措價。借使措置。亦不能多所買。不過數十畝。至一二百

畝而止。身在北京。不能自種。有限之地。不可以設庄頭。差人討租。往返盤費。所得租銀。隨手花消。實無營業之方。雖立法以均之。終至盡歸富戶。此必然之勢也。夫依古以來。使人自養。則有餘以官○名○實○明○代○附○于○示○。養人則不足。我國家苞桑鞏固。億萬斯年。八旗生齒。不可紀極。若不令其自爲生計。皆袖手而仰食。則雖多方籌畫。恐未必大有益也。查八旗公產。以及旗退餘存。入官等地。及此次贖回民典之地。不下數千萬畝。似應查明八旗另戶正身。如有情愿下鄉種地爲生者。不必取價上地。給與百畝。中地給與一百五十畝。下地給與二百畝。令其率領妻子居鄉耕種。初種之年。量給牛種房屋之

資一時雖不無所費而以一二百畝之田可使一家八口之眾永無饑饉之憂且子孫皆有常業不復仰給於官其爲利賴實屬無窮再查入旗有地之家從前亦多有在屯居住耕讀爲生者後因李禧條陳皆移住京城實於旗人無益臣之愚意除爲官披甲當差之人在京居住外其餘閑散人等如有情愿在屯居住自行耕種者俱各聽其自便如此則旗人皆知務本風俗漸歸淳樸且身耐勞苦則筋力強壯將來拔補兵勇必更勇健此則萬年富強之要術也抑臣更有請者查我朝定鼎之初雖將民地圈給旗人但仍係民人輪租自種民人自種其地旗人坐取其租一地兩養

此下另補一意

彼此相安。從無異說。至近年以來。則旗民往往因欠租脫地互控。結訟其弊皆起於取租之旗奴承租之庄頭攬租之地棍小民欲治良田。必積二三年之苦功。深耕易耨。加以糞治。田甫就熟。而地棍生心。遂添租挖種矣。稍有爭執。卽以民霸旗地告官矣。庄頭取租多索而少交。田主受其侵盜。佃戶受其侵漁。甚且今年索取明年之租。若不預完。則奪地另佃矣。另佃必添租挖種。添租租銀改重逋負必多。一遇歉收棄地而逃。併少租亦不得矣。旗人不能出京。多差家奴下屯。庄頭地棍聲色誘哄。欲博相從。所收之租。隨手花去。則又採次年之租矣。至於次年無租可索。而懼主責懲。則以

佃戶抗租爲詞矣。今年張甲至。明年李乙至。小民以爲租已預交。旗奴以爲租未收取。遂至互訟不休矣。田主苦於欠租。雖有地而無利。民人苦於另佃。求種地而不得。而於中取利。華衣鮮食者。皆庄頭地棍之家。剝良民以養奸民。甚可惜也。查地棍人等有司。可以懲治。臣當嚴飭地方官查訪得實。或被人告發。必從重嚴處。至於庄頭旗奴。則非有司所能制也。仰懇 皇上天恩。勅諭八旗王公。以及有地之家。如有不設庄頭。愿交有司催征者。臣當飭地方官按年催征完解。或有逋欠。將地方官照例叅處。如愿自置庄頭。或差家奴討取。亦悉聽其自便。但不得輕意更換種地之人。如庄

此法見行

頭家奴稟稱佃戶抗租。但令田主將歷年收租之額與當年所欠之租開一清單行文地方官查明果係佃戶抗欠自當追比完解。如係庄頭家奴於中作弊審明治以應得之罪。如此則庄頭家奴不敢侵蝕捏詐地棍人等自無所施其奸狡。旗人按年收租不虞逋欠。民人獲有常業不憂侵奪。臣乃可以勸其治糞土勤懇闢植。粟聚藝蠶桑庶幾民人漸至盈成之慶而旗人亦長享豐亨之福。洵爲旗民兩便之道矣。係奉旨交議事件。有關旗民生計。臣不敢不竭其愚昧之見謹詳悉敷陳伏乞皇上睿鑒施行。

層層駁詰層層指陳真是曉事人說話至謂旗民當散居種地

各自爲生則尤切大計雖陸宣公無以易矣

○太學條規疏

奏爲敬陳太學條規仰祈 睿鑒事恭惟我 皇上懋昭峻德覃
敷文教尤加意於成均祭酒司業既有專官又命臣嘉淦總司教
事欽奉 上諭大學爲教育人材之地必董率有方斯俊乂輩出
臣跪讀之下欣悚交深日夜思竭一得之愚與諸生講明切究以
仰副 皇上興賢育材之至意伏念造士之道宜先定其規模俾
○數○諸○條○之○提○人有常額學有常業至於歷久觀成亦必用及其時而後可以收
○下○三○條○分○列○養士之實效則肄業人員宜定額數也查肄業貢生蒙

世宗憲皇帝樂育深仁 賜南學官舍一所每年賞給銀六千兩

爲諸生膏火周恤及講課桌飯等費。臣等酌定貢監人等有篤志好學羈旅無依者。令其在內肄業。朝夕課誦。每月給飯食銀二兩。其有親友可託。或有館地棲身者。令其在外肄業。按期考課。每年給衣服銀六兩。遇有疾病及丁憂事故者。量爲周助。通行在案。恭逢我皇上聖人首出。多士振興。各省選拔人等。束裝負笈雲集京師。若概爲收錄。恐才質不齊。難以造就。欲量加甄別。則員無定額。無由取去。查歷年肄業人數。少至一百餘人。多至三百餘人。請嗣後六堂肄業人員。以三百名爲定額。每堂各五十名。以三十名爲在內肄業之缺。以二十名爲在外肄業之缺。凡到監之恩拔歲

副人等。臣等詳加考驗。擇其品端文優者。充補額數。有缺勿濫足額。之後。遇有續到之人。照前考錄。待其缺出。始行頂補。其衰老才庸者。令其回籍肄業。不得濫收。如此選擇精慎。則成均之士。皆英俊之材矣。再授業者。考校宜有實課也。國家以制藝取士。原欲其秉經酌雅。發明聖賢之精蘊。其法非不善也。但相沿既久。勦襲弊生。習舉業者。抄寫揣摩。以求速化。目不覩經史之全耳。不聞大道之要。幸而獲中。授之以政。而不達。非才不足。其所學者末也。顧帖噀文詞。既患其學成。而不適於用。卽高談性命。猶恐其能言而未必能行。夫比年入學。必有可督之課程。而後勤惰分。中年考校。必

以此爲經實爲良法

有○可○稽○之○材○能○而○後○臧○否○辨○伏○查○有○宋○胡○瑗○立○經○義○治○事○齋○分○課○
學○徒○蓋○取○其○顯○然○有○據○者○以○驗○德○業○之○進○修○其○法○可○至○今○行○也○臣○
等○請○酌○定○規○條○令○諸○生○四○書○八○股○之○外○各○明○一○經○各○治○一○事○相○其○
才○之○所○近○而○分○肆○焉○其○明○經○者○必○令○博○觀○先○儒○之○疏○解○熟○誦○

皇○上○所○頒○折○中○傳○說○彙○纂○諸○書○務○期○深○明○聖○人○之○意○有○裨○於○生○民○
人○倫○日○用○之○常○其○治○事○者○如○歷○代○典○章○史○鑑○事○蹟○以○及○律○令○錢○穀○
算○法○兵○制○河○防○之○類○務○期○講○究○明○切○實○可○見○之○施○行○歲○時○考○課○以○
此○分○其○勤○惰○期○滿○保○舉○卽○以○此○定○其○優○絀○如○此○則○教○者○有○所○施○其○
功○學○者○無○所○藏○其○僞○多○士○既○爲○有○用○之○學○國○家○自○收○得○人○之○效○

矣。再期滿錄用。宜及時器使也。夫治化之不及於古。由守令之無
○胡○安○定○事○得○來循良。守令之無循良。由科目之無賢俊。科目之無賢俊。由學校之
無真才。學校之無真才。由教職之無實學。而國子監者。教職所從
出也。恩拔歲副監生。皆應銓教職之人也。祭酒司業。聚天下之
應爲教職者。而教之。教成而布之天下。使各爲教職。以行其教。而
後天下之士。皆知向學。士知向學。則科目得人。科目得人。則教官
各舉其職。然後教化成。而禮樂可興。此教職之官。所關甚重。而貢
監之銓用。不可不加意也。乃今之所以用貢生者。則尙有可酌議
者焉。伏查各省拔貢來京。三年期滿。咨部別無錄用之途。北有復

設教諭一項於十一缺之後敘用一人計其得官之日必需二三十年之久夫選拔貢生原爲成均肄業而設也乃今不肄業而或已得官既肄業而轉無官可得不得肄業而得官則爵賞不足以爲勸而轉以滋飾修言貌踰等躁進之弊既肄業而不得官則目前之肄業者無由生其鼓舞而且使天下之爲教職者不出於成均之所教其成均之所教者終不能爲教職而行其教於天下仕與學不相資則講課與咨銓皆成空文而無實效不可不變通也請嗣後肄業期滿之人臣等詳加考驗除才質平常者照例咨部歸班候選外其有器明事治才品卓越者列爲一等照九卿揀選之

例帶領引見恭候。皇上欽定分發各省以知縣試用其或才猷未裕而學術醇正堪膺教職者列爲三等一體引見分發各省以教職卽用使出其講課之所得以立教衍經義治事之法以訓士數年之後分發既多則天下之教官皆稱其職將正學昌明而教化可以日隆人才可以日出矣。周子曰師道立則善人多善人多則天下治此之謂也。以上三條就太學中應行事宜備陳管見伏乞皇上睿鑒施行謹奏。

太學積輕至先生爲祭酒而後規模粗具此極有關繫之文

○撫綏苗獠疏

奏爲詳陳撫綏苗獠之法以靖邊圉事。伏查楚粵滇黔皆有苗獠。時或蠢動。僉謂野性。凶頑。難以馴服。今臣親至苗寨。詳加體察。乃知苗獠之可憫而易化也。查苗人最善種田。山頭石角無不墾藝。兼善蓋屋。曲室重樓。結構宏密。比戶皆有世業。以長子孫。又其語言文字。多與華通。臣傳集其頭人而訓導之。凡臣所言。皆能通曉。所過峒寨。扶老携幼。焚香跪迎。其誠懇如此。本不應有叛逆之事。而時或有之。則由經理之未善也。查內地武弁。不許干預民事。而苗疆不然。文員怯懦。不敢輕入峒寨。惟催糧及買物派夫。則差役

前去持票滋擾。此外一切爭訟劫殺等事。多係武弁管理。千把微員皆受理詞訟。汛兵營目皆勾當公事。威權所及。攤派隨之。於是因公科斂。文武各行其令。因事需索。兵役競逞其能。甚而沒其家資。甚而辱其婦女。苗人不勝其忿。而又無所告訴。是以發憤而與之併命。至於一殺兵役。而其釁遂開矣。武弁張大其詞。而通詳文員推諉其過。而捏稟爲上司者。或勦或撫。意見不同。行文查議。動經時月。苗人乃得聞風。而預爲之備。四處勾連。多方煽動。血酒一飲。則兩黨固結。木刻一傳。則良苗脅從。比及官兵之至。已聚集多人。乘高據險。此其所以反之易。而平之難也。幸而天威遠播。叛

逆削平。乃經營於事後者。仍復蹈其前轍。搜捕株連。奔兵之滋擾。愈多。叛餘子遺。文員之漠視。更甚。苗獠愈苦。而愈無所告訴。則乘釁復動。惟力是視耳。歷來治苗之官。既無愛養之道。又無約束之方。無事止於侵漁。有事止於勦殺。勦殺之後。仍不改其侵漁。則侵漁之久。勢必又至。勦殺若不改弦而更張之。其弊未有止也。記曰。君子因其俗。簡其禮。語曰。善爲政者。因其勢而利導之。夫苗人散居而處。故各服其頭人。亦其勢然也。凡作奸窩匪之處。兵役偵之而不知者。頭人能知之。門爭劫殺之事。官法繩之而不解者。頭人能解之。故治苗之道。治其頭人而已。但頭人甚多。不可無所統攝。

應於各寨之中用其頭人立爲寨長一峒之中取頭人所信服者立爲峒長使約束寨長而統於縣令眾苗有事則寨長處分息之寨長所不能息者告之峒長峒長所不能息者告之縣令縣令有禁約則傳其峒長而戒諭之使峒長告寨長寨長告眾苗如是則縣令於苗人有提綱挈領之方自有令行禁止之效但峒長之服於縣亦非可以刑驅而術馭也必實有所以役使之道臣之愚意每峒長一名應照鎮筸土百戶之例減半給與工食銀十二兩使四季赴縣支領計裁一兵之糧卽可養二峒長每縣峒長不過十數人則所費亦屬無幾而峒長旣衆養於官則其服役必勤峒長

有過犯縣令易置之則其守法必謹且一歲數至縣令之堂則凡朝廷之德意可宣而布也苗人之疾苦可詢而知也峒長數見縣令則凡有爭訟可訴官區處而無仇殺之舉縣令數見峒長則凡有公事可當面告語而無差役之擾縣令之治化既行苗人之服從自固則塘兵之在汛者可以酌量情形而漸次裁撤武弁之在營者可使恪遵公令而不預詞訟如此則文武之職守攸分兵役之滋擾永杜滋擾既杜則苗猺永安而無爭鬥悖逆之事所謂簡易立法因其俗而利導之也臣此次巡視苗疆於未經起程之先即差員弁前往苗峒諭以設立峒寨各長承辦公事不許兵役騷

擾之意。苗人聞之。歡忻鼓舞。報名註冊。比及臣至之日。峒長寨長數百人。俱改易服色。剃頭著帽。羅拜道左。臣分別賞給。峒長給以銀牌紅綢。寨長銀牌紅布。隨據峒寨各長連名具呈。稱蟻等初歸仁化。實望教訓生全。以後各寨如有不法等事。蟻等查實。卽行報知文武衙門。一面拿解請治。不敢煩動兵役。如蟻等隱匿不報。查出領罪不辭。如有公事差遣。或有審問人犯。惟乞開載姓名。令蟻等按名押赴衙門。若有違誤。亦甘領罪等語。則其苦兵役之滋擾。而樂於自行承辦之意。亦情見乎辭矣。查城步之苗峒有五。每峒設立正副長各一人。共峒長十名。應支工食銀一百二十兩。綏寧

之苗峒有四應設正副八人。又因寨多地廣於挾一挾二六甲六馬等處添設五人共峒長十三人。應支工食銀一百五十六兩。此項公食亦無容動支正額。現今各峒清出叛產除設立堡卒之外尚有餘田招民租種。卽於叛產租穀內給發如此則以苗養苗而國帑不費。以苗治苗而官吏不勞。但得一良有司選擇數峒長而撫綏之訓誨之盡去。攤派之習嚴禁兵役之擾則苗人得安耕鑿之業自不改其愿朴之素。上下之情懽忻交通雖有悍奸無庸煽惑而兵端可以不生。疆圉可以永靖。邊兵可以漸撤矣。謹將苗人實在情形與臣所以辦理之方詳悉敷陳伏乞 皇上訓示施行。

謹奏

只立寨長峒長治其頭人而苗已治矣擊領振綱莫善于是